

鷄澤縣志卷二十

宦蹟

孔子喻宰邑於割雞而言偃以學道愛人之說進蓋批郢導窾奏刀善然卽以宰天下不難也要惟忠信慈惠乃見所居民富所去民思而武健不與焉雞蕞爾地毋曰小鮮易烹孰是游刃恢恢足勝割雞之任者今採漢唐來治行尤著諸人詳載於篇誌宦蹟

知縣

三國魏

司馬芝字子華河內溫人少避亂遇賊芝獨守老母不去賊義之遂得免仕魏武爲廣平令性耿亮將軍劉勳貴寵驕豪與芝書多所屬託芝不報一皆如法遷大理正歷甘陵太守所在有績

唐

程名振平恩人隋大業末仕竇建德爲普樂令盜不跡境俄棄賊歸唐授永寧令經略河北尋拜平壤道行軍總管攻沙卑城破獨山陣遷營州都督兼東夷都護擊高麗於貴端水焚其新城累封東平郡公卒贈右衛大將軍謚曰烈

鷄澤縣志

卷二十

宦蹟

金

高 琢隆州利涉人承安中以詞賦進士任邑令是時文教湮闕公首建大成殿兩廡繼修稽古堂兩齋房崇聖育材士風由是彬彬焉

元

劉明善大名人至正中任邑令見事精敏勤於吏治值秋久雨沙洑水漲城西泛濫壞民田廬公募夫修築長堤水不爲害至今賴之有富民被盜捕之不獲功勸課行次柳下見冀孫兒等踪跡可疑訊得其情又發威州茶商隱弊立辦課額摘伏若神盜賊斂跡三年考績去
霍安道平山人至正中任邑令謁先聖見學宮摧圮捐俸鼎新創禮器修齋房設社學拔俊秀肄業社師歲給以粟親詣鄉社勸民植桑會河南盜賊蜂起奉檄重修城垣濬池納水兩岸植柳得恃以無恐遺惠至今賴之

明

譚 肅字本恭山東壽張進士成化中任邑令政尙廉惠明察不苛築城障川力起凋敝值大水爲災親詣鄉垂淚安撫之招恤流離嚴捕盜賊聞有質子女以納糧者公爲贖還適鄉民張某以掘地得錢數百串報縣公悉散之代償民債相傳爲惠政格天去後民立碑

邵 錦陝西商州舉人宏治中任邑令時當大疫後紀綱廢弛人心玩愒公清白自矢法律凜然損益因俗催科不擾民甚便之值流賊亂縣境騷動鎮撫捍禦邑以保全去後民思之祀名宦

銀 鏡字本明山西太原進士正德初任邑令節財費減賦役廣儲周歲民復業盜賊屏息尤加意文教培植士子覺序間彬彬興禮讓焉適薊寇至備禦有方賊聞風解去三年奏最百廢俱舉擢戶部主事百姓如奪慈母

唐 音江蘇武進舉人嘉靖中任邑令才瞻力勤仁撫黎元義制胥吏抗權貴絕請託毀淫祠尤盡心於獄訟朝議市馬他縣多以威勢取於民間公不忍上官督之急卽投劾請去民間之爭自出馬半日而足其馬肥好又爲諸縣最時陶真人假寵所遇有司拜謁唯謹公獨不往暇則以文課士督學院公嘗語諸生日欲希聖賢門路卽取法唐雞澤可也後卒於官橐無餘貲子一鷹中嘉靖己酉解元乙丑會魁

常世勳號地山陝西涇陽舉人嘉靖末任邑令秉性嚴明刑清訟簡修城垣興學校放逐姦蠹盜賊屏跡調繁定襄去民立碑

張受道山東日照歲貢萬歷中任邑令果毅有爲公正不阿修築磚城聽訟明斷以不善事上官去公論惜之

鷄澤縣志

卷二十

宦蹟

二

白起巨湖廣華容舉人萬歷中任邑令明敏端介爲民興革權貴莫撓常乘驢至田間勸民濬井樹桑先是戶日編征用三等九則例富影貧差產廢徭存叢害滋甚又倉斗級賠累每至傾家公悉詳允革除當事者丁止徵銀一錢餘盡攤人地畝斗級召募應役於雜派內徵銀十兩爲修盤用至今稱便創澤陽書院躬自課誨士子多所成就以不阿權貴掛冠去子竹以進士爲名臣

李必達陝西城固舉人萬歷中任邑令耿介明敏首葺文廟每朔望講學明倫堂訪民間利病次第興除徵糧不事扑責聽訟一歸平允有請託者重懲之雖權貴不少屈要庄村民被盜以一人出首誣衆公爲辨其冤并獲眞盜人服其神明考績事峻以艱去民立祠祀之

曹大章山西襄陵舉人天啟中任邑令方正不阿政尙簡易馭吏以嚴催科不用胥役錢糧毫無羨餘各鄉車牛芻米之類輪流應官者註簿鈐記週而復始無賂脫重累諸弊聽訟剖決如流案無留牘里巷不逞之徒使註名籍朔望投供狀獎賞悔過否則重懲以是改行者甚多諸生與外事斥責不少貸文行優者又委曲玉成之以不善事上官未得開荐司李徐公抗言於直指前曰如曹雞澤者海內無雙若殿最一清恐無以存公道於是始列荐章都門刊清官圖說大計舉卓異第一以艱去士民思之祀名宦

清

吳應文遼東瀋陽人監生順治初任邑令資性慈祥儉易有犯法者不忍苛以刑修葺學宮城池衙署以及堤橋公所百廢俱興續修縣志嚴城守清保甲徵糧無羨餘凡上官移文稍有不便於民者不憚再三申請每春雨霑足單騎勸農桑士民愛戴如父母焉陞濟南府知府

譚尚箴字克非湖廣衡山進士康熙間任邑令倡修義學加意人材每課士悉心評隲必面於講解文義優者厚給獎賞以示鼓勵賓興捐俸餽送有應童子試者卽免其差徭人知向義文風蔚起陞吏部文選主事

劉士玫陝西涇陽舉人康熙間任邑令精明慈惠民受其福因解餉軍前受寒瘴回署疾作卒於官士民思慕不衰

郎 銘鑲黃監生雍正初任邑令清廉仁厚值大水請賑屢被批駁且將不測公不爲懼復涕泣面陳實爲 上感動得奏請賑猶有不及者出養廉以給之全境得公大惠民爲尸祝於家

黃在中江西宜春進士雍正間任邑令仁慈廉明勤儉節用愛民若子待士以禮凡有餽納者概卻之不受逢大旱齋宿城隍廟兩旬得雨始回署嘗憫書役逋欠貧無可償爲捐俸代補七百餘金尤爲難得以艱去任

王光燮字麗三江蘇武進進士乾隆十五年任邑令耿介廉節動於政治凡興利除害有裨於士民

鷄澤縣志

卷二十

宦蹟

三

者不怠益虔如建義學築城堤浚沙河而共慶安瀾濬興隆而兼資灌溉居民至今頌禱之

學博

明

李一寧廣東東莞舉人正德中爲邑教諭丰度端凝舉止不苟諸生凜其訓無敢屑越賢關者而和平樂易接之如飲醇醪學業深邃蔚有文采郡守重其文行檄掌漳川書院表率多士

龔世仰浙江龍游舉人萬歷初爲邑教諭秉公不屈行恕有恒適兩生因事被革力爲復之歷攝三縣篆具有實績陞望江知縣

于 遴霸州歲貢萬歷間爲邑教諭質樸耿介雅有操持時督學左公以歲試例督察諸生劣行者屢檄不應峻詞索之毅然日雞士蒙公培植人知自愛遴敢徇例以不肖誣人傷公德化乎卒無所報遷乾州學正

王 法灤州歲貢天啟初爲邑訓導博洽多聞尤精焦氏易與諸生剖析奧義淵源不竭皆中理解嘗吟咏槐陰中烹茶倒履藹然可親蓋金玉君子也以病卒於官士子不勝哀慕釀金以斂焉

胡永亨交河歲貢崇禎間爲邑教諭氣岸磊落善騎射勇敢過人間與諸生較射論文意豁如也戊寅城破被難士民哀之

崔世勳平山歲貢崇禎間爲邑訓導性芳潔遇諸生嚴而有禮值姦民訟生於學者以賂進卻之曰以賄賂爲曲直慚德孰甚焉子弟有過吾自當懲之何物錢神效靈遂以菜傭辱青衿爲也戊寅城破遇難多士傷之

馬騰龍密雲歲貢崇禎間爲邑訓導甲申流寇之變與生員殷淵同謀倡義事敗爲闖賊僞令所殺母年八十亦遇害士庶爲流涕

清朝

王承命行唐歲貢順治間爲邑教諭亢爽質直無匿情新生應進贄禮察其貧乏者卻不受轉給以膏火資後署縣事遇 詔徵取車驟倉卒立辦蠹吏弊竇一無所容人以公正才幹稱之陞長子縣

王國瑾昌平歲貢順治間爲邑訓導忠信待人不修邊幅集本學知名士於金龍閣課業捐俸備饌寒暑不輟後奉裁改補順德府

黃 伉號寶華元城舉人順治間爲邑教諭坦易近人無疾言厲色長於詩古文詞樂與人爲善對之者如坐春風中日夕召諸生課文藝捐俸供給嚴肅如棘闈次日復聚於明倫堂手披口講往復不倦士皆心服嘗署縣事後以教諭奉裁士子送之遮道垂涕公亦流連不忍去

鷄澤縣志

卷二十

宦蹟

四

王 渠大興教習康熙間爲邑訓導持躬謹嚴應事周密雖盛暑見諸士未嘗少去衣冠文藝亦彬彬擅長陞江南金山衛經歷

張 璋義州歲貢康熙間爲邑訓導砥節礪行訓士有方嘗植槐柳百餘株學宮掩映可觀弟璫從之任後卒於官璫奉嫂撫姪遂僑居焉